

摘藻堂四庫全書薈要

集部

欽定四庫全書薈要

集部

淮海後集卷一  
一至六

詳校官助教臣謝登雋



欽定四庫全書薈要卷一萬五千二百五十九

集部

淮海後集卷一

宋 秦觀 撰

言古詩

進南郊慶成詩并表

右臣伏覩皇帝陛下肇修典禮冬日之至親有事於南郊仍復祖宗故事以皇天地祇合祭前期之日陰雲蔽空將祀之夕月躔畢宿詩云月離于畢俾滂沱矣於法



當雨而是夜開霽特甚晏溫星月昭明禮畢之明日雨雪乃作朝市郊野相告欣然頌歎之聲形於中外非二聖有作上當天心神祇顧享何以逮此臣雖疎賤通籍秘省預見熙事不勝犬馬區區之情輒將輿人之頌撰成郊禮慶成五言二十韻詩一首隨狀上進干冒宸嚴臣無任瞻天望聖激切屏營之至

於赫龍飛後中區八月秋合嚴天地祀遠繼祖宗休熙事將興舉彝章預講諏紛然曲臺議斷自太任謀宗伯

方承命元龜遂告猷三錢封內帑五瑞輯諸侯路寢前  
齋玉清宮復射牛長迎南至日圓即自然丘扈蹕三千  
劍干霄十二樓鈎陳嚴御座太一奉宸遊好雨虛聞畢  
生陽不待鄒浮雲依斗散華月亘天流宵被黃裯却霜  
空曲蓋收堪輿同顧饗河嶽盡懷柔麾日初鳴仗旂風  
不滿旒回鑾龍入馭傳詔鶴為郵崇慶天難老華胥聖  
不憂衣冠千玉簡宇宙一金甌可但豐年屢當知世德  
求慙無班馬手作頌配商周

幽眠

幽眠起常晚冬晷復不長中間數十刻倏如驚燕翔晨  
食粗云畢申鼓鳴相望忽忽竟何就念之動中腸天地  
一逆旅死生猶轉商暫來旋云去遲速乃所常較計亦  
何補徒然費慨慷不如聽兩行一槩付酒觴北風吹老  
槐白日轉紙窗布衾一覺睡身世成渺茫宿莽冬不衰  
蘭茝幽更芳無庸傷局促速此鬢髮霜

越王

越王念吳役寢興常不安有臣曰種蠡實與同難艱終  
酬會稽耻列國不敢干智者見未兆愚夫暗前觀范公  
拂衣去扁舟五湖間清輝照四海秋月耿雲端種也竟  
不悟處之若無難屬鏤一朝至身與名俱殘兔走獵狗  
悲鳥盡良弓閒自古身不退多為世所歎

隕星石

蕭然古丘上有石傳隕星胡為霄漢間墜地成此精雖  
有堅白姿塊然誰汝靈犬眠牛礪角終日蒙羶腥疇昔

同列者到今司賞刑森然事芒角次第羅空青俛仰一  
氣中萬化無常經安知風雲會不復歸青冥

山陽阻淺

一日行一尺十日行一丈豈不歎淹留所幸無波浪悲  
風動深夜原野眇森爽青天行蟾蜍枯水轉魍魎此時  
蓬茅下去心劇於癢棄置勿復論通塞如反掌

次韻參寥莘老

迅風薄高林萬象號虎豹紛披枳與棘爾復鼓狂闌我



垣既已頽我棟又以撓豈無一木枝橫力難與較黎明  
忽自罷晴日射魚罩死水失狂瀾衰木回故貌勞生真  
夢事往趨如睡覺炊黍焚黃鵲吾其理歸棹

送洪景之循州參軍

寒梅不自重輒花桃李先矯枉有佳菊最後衆芳妍各  
因一時美難以相嗤憐物理固若是士林亦宜然夫子  
南國俊聲猷推妙年數竒晚方偶參軍古龍川龍川雖  
云遠風物號清鮮羅浮不相下頽頽巉荒天雲鬢二三

子聊足奉周旋行矣試老拳歸歟遠翔騫

茶

茶實嘉木英其香乃天育芳不愧杜蘅清堪揜椒菊上  
客集堂葵圓月探奩盃玉鼎注漫流金碾響杖竹侵尋  
發美鬯旖旎生乳粟經時不銷歇衣袂帶紛郁幸蒙巾  
笥藏苦厭龍蘭續願君斥異類使我全芬馥

茶白

幽人耽茗飲剝木事擣撞巧制合曰形雅音侔祝椀虛

室困亭午松然明鼎窗呼奴碎圓月搔首聞錚鏦茶仙  
賴君得睡魔資爾降所宜玉兔擣不必力士扛願偕黃  
金碾自比白玉缸彼美制作妙俗物難與雙

石魚

佛宮琢琳瑯懸魚警羣聰緩扣集方袍急拊趨百工雖  
無筍虞器自協徵與宮犁然當人心邈有炎氏風山泉  
自疏數珮玉相玲瓏朝昏間鐘鼓清響傳無窮惟有寶  
陀山於音獲圓通一聞如得解石鞏亦投弓

劉公幹

鄴中多賢豪公幹氣飄逸弱歲頗徊徨飄零低金室君  
王事遨宴下馬列琴瑟豪吹挾哀彈娛歡非一日當年  
侍賡酬珠玉在揮筆五字一何工妙絕冠儔匹所得雖  
經寄未得偏人失

贈醫者鄒放

百工皆聖作惟醫有書傳緒餘起人死妙處實通天鄒  
子本淮海弱齡加討研岐扁逢卷中遂知百病先往歲

遊京室公侯紛薦延國工不敢妬遣兒求執鞭晚棄本  
州役青衫鬢蕭然臨衢開大肆旁午送金錢嗣子頗不  
凡文場早周旋行期拾青紫善積神所憐

贈張潛道

張生何為者落魄不自拘獨攜三尺琴笑別妻與孥一  
來泊吾里忽已月再虛朝遊故人館暮止佛子廬雖無  
食羹餘所樂常晏如我欲有所進生聞勿煩紆君子閒  
有道不專塊然居無道祇深適嗚呼亦已愚願生脫塵

鞅從我滄海隅

荷花

方塘收雨脚落日半遙岑  
芙蕖淨娟娟麗服撫翠衿  
無言意自遠欲渡秋水深  
緬懷平生人對此詎可尋  
弄芳惜晚晚酒至誰與斟  
天涯有歸雲聊寄相思心  
心開獲清賞芙蕖一何綺  
美人艷新粧斂袂照秋水  
端如蕩子妻顧自良家子  
黃金選燕趙搖落對江沚  
薄暮風雨來獨立淚如洗  
望君君詎知傾宮定誰似

酬曾逢原參寥上人見寄山陽作

倦客當老秋忽忽少佳意孰云塵滓地劉阮肯俱至一  
披清骨毛再見失身世有如執盛熱僚月濯涼吹又如  
觀巨梓却覘蕭葦細十辰同遨遊不覺日車逝嗟予逃  
空虛終日面林翳聞人足音喜况乃道所契方念衣袖  
分明月忽我畀眷言何以酬白髮同所詣

吳興道中

黽勉華門下十年守一方胡為御舟者挽我置此傍青

山不肯盡流水故意長雖云道里遠瓦樽有酒漿

無題二首

君子有常度所遭能自如不與死生變豈為憂患渝西  
伯囚演易馬遷罪成書性剛趣和樂淺淺非丈夫

世事如浮雲飄忽不相待歎然化蒼狗俄頃成車蓋達  
觀聽兩行昧者乃多態舍旃勿重陳百年等銷壞

喜雨得城字

陰陽有常職代卸不可并一氣或錯繆愆伏相寇兵維



時四月交南國厭久晴風師挾帝令呼號肆徂征雲師  
畏推逐蓄意不敢爭雨師曠厥官所苟朝夕生黃塵暗  
如霧掩彼日月明帝眷一夕回旱議沮莫行番然需膏  
澤夜半來雨聲黎明縱遐眺溝澮各已盈青秧散廣畝  
白水涵孤城耕夫欣有託水鳥飛且鳴乃知化工妙悠  
然信難名行矣耘我穡歲終屹抵京

東城被盜得世字

野人無機心觸事少防衛所至輒酣寢屢墮穿窬計孤

亭夜深墨風死雨初霽有盜穴壁來攘取逮衾袂微思  
不敵怒弱力鼓虛銳起搏且復呼可否難量勢誰云同  
室鬪函丈莫相繼兩奴眠牖旁矯首但睥睨棄之倚柱  
休盜亦從此逝慚無牛缺賢幸脫燕人斃亡弓豈須求  
失馬不必涕黎明成感歎事往若異世良賈號深藏無  
閔稱善閉君子勿我誇得喪求無際

夢伯收文公

昨夜夢故人心顏少歡趣自嗟棄有司却言歸山路君

王下明詔羣英翕爭赴焦鵬共揮翮跋鼈亦騁步擾擾  
天地間飛鳥不知數何意獨蕭條命與時相忤空復蔽  
馬牛不為匠人顧昔為土中花行待東風煦今為簷下  
草遠矣霑秋露老母鬢成絲寒妻被無絮歲莫多嚴風  
締綌將焉度覺來不復見撫枕淚如注安得萬頃陂活  
此舟中鮒

秋夜病起懷端叔作詩寄之

寢瘳當老秋入夜庭軒空天光曉如洗月色清無縫風

颺戾戾輕露氣霏霏重簷花伴徐步籠燭窺孤諷緬維  
情所親佳辰誰與共夫子淮海英材大難為用秉心既  
絕俗發語自驚衆塵尾扣球琳筆端攢螭螭雄深迫揚  
馬妙麗該沈宋浮沈任朝野魚鳥狎鯢鳳與時真楚越  
於我實伯仲爾來居邑鄰頗便書札貢上憑鴻雁傳下  
託鯉魚送二物或愆時已辱移文訟人生無根柢泛若  
凌波葑昧者復汲汲晨暝趨一閨陰持含沙毒射影期  
必中自匿嫫母容對客施錦幪溘然一朝逝萬事俱成

夢形骸猶汝辭利勢猶君動思之可太息傷之為長慟  
所以古達人脫身事高縱我生尤不敏胃腹常空洞彊  
顏入規模垂耳受羈轡行謀買竿棧名理就折衷但恐  
狂接輿煩君更嘲弄

送孫誠之尉北海

吾鄉如覆盂地據揚楚脊環以萬頃湖黏天四無壁蜿蜒  
戲神珠正晝飛霹靂草木無異姿靈氣殊鬱積所以  
生羣材各抱荆山璧小為百夫防大為萬人敵夫子少

邁倫喑鳴阻金石奏賦明光宮玉座瞻咫尺翻身墮雲  
霄十載迨窮厄焚舟更一戰得尉滄海北五月乘畫船  
簫鼓事遠適天橫齊山青雨帶楚水黑勿云晚方仕四  
十乃古昔勿云名位卑九萬自此擊幽求尉朝邑鬢髮  
森已白元振尉通泉律令非所即一朝會風雲闕文  
抱甕

捐捐抱甕人泣呼治其內仲尼為所輕子貢無以對捨  
器欲還樸為量固已隘苟得渾沌真寧羞事機械

讀列子

咄咄兩小兒多言空爾為後之日無定不覺心有期尺  
捶探蒼溟但令傍者嗤誰謂不能決孔子乃真知

和顯之長老

禪子觀因緣寸晷無復餘講人治經綸艾夜猶未除冷  
風奏哀松寒月挂碧虛此意了不諭悲哉同翳如

清夜

子夜天無雲稀星耿耿碧茫茫行役者對此焉不息胡

為蝸角端相與競尋尺勸君歸去來飛空鳥無跡

南池

汎汎池中鳬上下與水俱不與水爭力所以全其軀遇  
物貴含垢修身戒明污胡能若雲月浪自驚羣愚

和王定國

崢嶸歲月徂物色莽於邑歡言公子至坐失百憂集宵  
箔蕙煙橫寒炮玉脂泣勉旃決南圖荷華行滿隰

題五柳亭



結構依流水新題五柳亭登臨有遺味攀折不勝情隔  
岸閭閻鼓遶軒舟舫橫

秋興擬韓退之

逍遙北窓下百事遠客慮無端葉間蟬催促時節去愁  
起如亂絲縈纏不知緒日月豈得已還復役朝暮人生  
均有得悲歎我不悟春秋自天時感憤亦真趣

擬孟郊

曉風有暴信暮蟬無好聲曉風與暮蟬自與時節爭獨

客辭故鄉推車謁梁城梁城道迢遞區區役吾生不如  
歸舊山藜藿安性情

擬韋應物

坐投林下石秋聲出疎林林間鳥驚棲豈獨傷客心物  
亦有代謝此理共古今鄰父縮新醅林下邀同斟癡兒  
踏吳歌姪姁足訛音日落相攜手涼風快虛襟

淮海後集卷一

欽定四庫全書薈要卷一萬五千二百六十

集部

淮海後集卷二

宋 秦觀 撰

七言古詩

宿金山

山南山北江水流半空金碧隨雲浮  
我來仍值風日好十月未寒如晚秋  
山僧引客尋蒼翠歷磴參差到平地  
萬里風來拂骨清却憶人間如夢寐  
夜深無風月入扉

相對老人如槁枝流水與天爭入海共笑此心誰得知  
下山却向中冷望番憶當時在屏障老母思兒且欲歸  
回首雲峰已天上

別賈耘老

若有人兮雪之濱服火齊兮冠切雲有才不為世所掄  
盡入詩句為奇新忘歸繁弱不浪陳發必中的疑有神  
目關飛鳥緡蒼鱗俛仰自娛忘賤貧繫我與君素參辰  
孰為一見同天倫共指飛光易沉淪莫若痛飲還我真

況有內子賢文君終日叫呼不怒嗔酒酣往往出前珍  
瓦甌竹筴羞青芹左列文史右紅裙樽前不覺徂清晨  
念我行當西道秦桴舟來別非所欣欲託毫素通殷勤  
郢匠旁矚難揮斤人生百齡同臂伸斷梗流萍暫相親  
行行飲酒且勿云丈夫萬里猶比鄰

李端叔見寄次韻

君文豪膽無與儔使我吟諷忘離憂浩如沅湘起陽侯  
翻星轉日吞數州華章藻句饒風力頃刻朱紅迷畛域

一斑縱復為管窺萬派終難以蠡測區區文墨倦高情  
解鞅還游恍惚庭半槽新水六尺簟臥視雲物行空青  
伊我籃輿抵京縣溽暑黃埃負初願君家只在御城東  
彌月不能三兩見求仙未若醉中真蟻鬪蛾飛愁殺人  
清都夢斷理歸棹回首一樹瓊枝新歸來草木春風換  
世事蜎毛那可算幸謝故人頻寄書莫笑元郎自呼漫  
陳令舉妙奴詩

西湖水滑多嬌嬈妙奴十二正芬芳肌膚皙白髮腳長

含語未發先有香溪上夜燕侍簪裳皎如華月墮滄浪  
音聲入雲能斷腸不許北客辭酒漿主人藹藹邦之良  
少年射策謁未央俊詞偉氣森開張玉杓貫斗生怒芒  
天欲文采老更昌故使歛翮窺羣翔五十僅補尚書郎  
浩歌騎牛倚徜徉東風戲雨花草狂二溪泱泱青黛光  
妙奴勿倦侑羽觴主人正欲游醉鄉

自警

古人去後音容寂何處茫茫尋舊迹君看草遍北邙山

骷髏猶來丘壘積那堪此地日黃昏長途萬里傷行客  
只知思愛動傷情豈悟區區頭已白莫嫌天地少含弘  
自是人心多褊窄爭名競利走如狂復被利名生怨隙  
貪聲戀色鎮如癡終被聲色迷阡陌休言七十古稀有  
最苦如今難半百聞道蓬宮仙子閒紅塵不染無瑕謫  
日月遲遲異短明三峯秀麗皆仙格女蘿覆石蔓黃花  
芝草琅玕知幾尺桃源長占四時春漾漾華池真水碧  
乘槎擬欲扣金局巨浪洪波依舊隔歸來芳舍與誰儔



老鶴松間三四隻  
唳天聲動彩雲飛  
對我時時振長翮  
驂鸞未遇且悠悠  
盡日琴書還自適  
紛華任使投吾前  
爭奈此心終匪石  
拜命懷金誰謂榮  
低頭未免拾言責  
從茲俗態兩相忘  
笑指青山歸路僻  
同人有志覓長生  
運氣休糧徒有益  
須知下手向無為  
莫學迷徒賴針灸

陪李公擇觀金地佛牙

薄伽梵相含空虛  
化人分段同璠璣  
爾來示滅二千歲  
真骨萬里傳中區  
錢塘有尼號法照  
得自禁掖藏金鋪

欲因此勝高構閣假設象似開羣愚偶從好事至雲上  
持出瞻玩相歡娛靈牙寶色玉不如上有無數光明珠  
莊嚴一一出御帑蜿蜒繡袋榮碑礫是時賓客盡上士  
面向已登十地初殷勤稱讚出軟語坐人顧盼驚俗汚  
因悲人生信如夢浪逐聲勢霜鬢鬚一源清淨誰復無  
枉入諸趣更崎嶇願因今日詣真際古松白日常蕭疎  
乃知金仙妙難測餘潤普及霑凡枯况復老尼亦才辯  
朱甍碧瓦非難圖行看岵嶢倚青嶂翁媼頌說傾三吳

# 雪浪石

漢庭卿士如雲屯結綬彈冠朝至尊登高履危足在外  
神色不變惟伯昏金華掉頭不肯住乞身欲老江南村  
天恩許兼兩學士將兵百萬守北門居士彊名曰天元  
寤寐山水勞心魂高齋引泉注奇石迅若飛浪來雲根  
朔南修好八十載兵法雖妙何足論夜闌番漢人馬靜  
想見堆堞低金盆報罷五更人吏散坐調一氣白元存  
和蔡天啓贈文潛之什

蔡侯飽學困于釜濯足清江起南土劇談頗似燕客豪  
快奪范睢如墜雨東城橋梓未足論栢直何為口方乳  
蔣侯山中伴香火三年不厭長蔬苦平生瑰瑋有誰同  
要得張侯三言語晝閒那自運甕忙時清不用聞鷄舞  
桓榮歡喜見車馬書冊辛勤立門戶要當食肉似班超  
猛虎何嘗窺案俎

秋興擬李白

芙蓉露濃紅壓枝幽禽感秋花畔啼玉人一去未回馬

梁邊燕子三見歸江頭白蘋老波底尺書不來空相望  
斜吹疎雨濕秋江霜風暗引芙蓉香石上菖蒲三尺長  
綠頭鴨兒棲萍草採蓮女郎笑花老木蘭船上動江水  
不覺鴛鴦帶波起

秋興擬玉川子

南州有病客起臥北窓下玉兔啣花照清夜故人別我  
京洛遊不寄一行三改秋秋色變冷客裘薄漸覺衣袂  
寒颼颼作詩欲寄君未語先有愁不如呼童起危坐北

窓下一杯寬我千日憂眼前俗事何擾擾此夕盡向杯中休何必懷黃金印兮爵通侯

擬李賀

魚鱗甃空排嫩碧露桂梢寒挂團壁白蘋風起吹北窓  
尺鯉沉沒斷消息燕子將鷓欲歸去沈郎病骨驚遲暮  
濃愁茫茫寄何處萬里江南芳草路

淮海後集卷二

欽定四庫全書薈要卷一萬五千二百六十一

集部

淮海後集卷三

宋 秦觀 撰

五言律詩

排律附

次韻孔彥常舍人曝書

上帝圖書府傳觀詔特容嘉賓  
蒼佩玉盛饌紫駝峯散帙牙籤  
亂開函錦襲重君羹如可請願備  
北堂供

悼王子開五首

我昔官房子長懷忠穆賢里無行馬第山有臥牛阡當  
代三公後惟君五福全桐棺遠歸祔追舊幾潛然

卓爾金閨彥頤然玉筍班周旋三友益零落十年間輶  
輓靈輶動悠揚素旒還暮年還抱愛應復辨追攀

蕭散竹林風平生約畧同官班嵇叔夜年輩晉安豐民  
詠濡須政朝推胸臆功九原無復作埋玉恨何窮

南浦維舟訪東堂抵榻眠後期猶指日輕別遂終天墨  
妙今初貴詩名久已傳清風如未墜諸子更翩翩



已矣知無憾賢愚共此途  
白駒馳白日黃髮掩黃壚  
和氏終歸趙干將不葬吳  
拏病如可彊猶擬奠生芻

次韻安州晚行寄傅師

投暮安州北蒼煙亂眼昏  
茅茨人外路砧杵月邊村  
野水飛雲薄空林噪雀繁  
幾人堪此樂逢客莫輕論

五言排律

次韻莘老

妙齡隨計日紺髮度關年  
較藝先豪俊飛聲動眇綿  
祕

書窺甲乙密室詣溫宣已叶半千運仍親尺五天御香  
春晚炷宮蠟夜深燃漢殿螭頭筆岐藩幕下蓮孔鸞人  
共貴蘭蕙世皆憐附尾方瞠若提刀獨砮然皂囊封細  
札青簡續遺編壁府深難造龍媒雋莫先大農參奏計  
宗伯與興賢玉鉉行真即金甌忽浪傳兩輪苔上駕百  
丈剡中牽荏苒馮唐老淹回賈傳還星霜俄九換金竹  
遽三遷鼓吹吳雲外旌旂楚水壖經綸殊未倦憂患復  
相連惡草空搖毒羣蝸謾污涎松筠終不易雨露竟無

偏憔悴千株橘荒涼二頃田幾書借船帖屢廣絕交篇  
禪譽推龐蘊親評主閑騫懶因閒處極樂向靜中全歲  
月黃塵裏鶯花白髮前冰臺清照底玉海湛無邊身世  
尤飛隼功名眇蛻蟬蕉心難固待楮葉謾勞鐫佇續清  
都夢還隨濁世緣泉虬淹已久風翮去應便預想朝元  
處簪裾立萬仙

送陳太初道錄

先生簪紱後世系本綿瓜駐馬生枯骨回車濟病蛇帶

雲眠酒市和月醉漁家落日千山路西風一枕霞幾年  
流俗笑一旦五侯誇碁惜春深日琴憎雨後蛙背因書  
字曲髮為註經華地轉東淮水天回北斗車新宮黃道  
近舊隱白雲遐顧我身多累逢君意謾誇空提方士劍  
未上客星槎何日同歸去重飛九轉砂

贈蘇子瞻

嘆息蘓子瞻聲名絕後先衣冠傳盛事兄弟固多賢感  
慨詩三百流離路八千直心羞媚竈忠力欲回天縲紲

終非罪江湖祇自憐  
饑寒常併日疾病更連年  
明主無終棄西州稍內遷  
奏言深意苦感涕內人傳  
前席須宣室非熊起渭川  
君臣悅相遇願上角招篇

觀寶林塔張燈次胡瑗韻

飛來峯上塔然蠟奉慈觀互照  
三山豕分輝七寶欄勢擎金界  
迴影蘸玉奩寒次第邊烽舉  
高低祭燭攬虹旌排陣堞火傘  
御靈官魏乘珠千顆隋帆錦萬  
端華敷連藏海光集西宮壇炯  
炯連青昊熒熒逼翠巒月卿秋  
抒

思星將夜濡翰繼聽鈞天奏尤知屬和難

還自湯泉十四韻

歲晚倦城郭聯驂度業莪天黃雲脚亂村黑鳥翎訛潦  
水侵生路晴天落漫坡澄江練不卷溫井鑑新磨漁火  
分星遠沙鷗散點多霸祠題玉筋龍窟受金波琬琰存  
吳事兒童記楚歌孤龕瘦居士雙塔老頭陀飛鼠鳴深  
穴胡蜂結巧窠晚參圓白足昏梵禮青螺雲馭沉荒甃  
仙春沒淺莎杖藜從莫逆談笑入無何慘澹日連霧蕭

騷風轉阿華清俄夢斷回首失煙蘿

淮海後集卷三



欽定四庫全書薈要卷一萬五千二百六十二

集部

淮海後集卷四

宋 秦觀 撰

七言律詩 絕句附

送佛印

抱包初捨蔚頭藍  
江月松風處處參  
他日惠林為上首  
幾年彌勒作同龕  
真珠撒帳開新座  
飛鳥銜花繞舊庵  
雲散虎溪蓮社友  
獨依香火思何堪

次韻公闕會流觴亭

偷引湖光一派飛詠觴還却似當時吳歌送酒隨流急  
越艷浮花轉曲遲山廟早因前守徹冰盤元是故工遺  
年年禊飲今非昔不到蘭亭到北池

次韻公闕會蓬萊閣

林聲撼撼動秋風共躡丹梯上臥龍路隔西林三兩水  
門臨南鎮一千峯湖吞碧落詩爭發塔湧青冥畫幾重  
非是登高能賦客可憐猿鶴自相容

送羅正之兩浙提刑

豈為鱸魚憶故丘  
東南昏墊賴良謀  
一封暮別雲間閣  
三組秋歸海上州  
子政暫為都水使  
千秋終作富民侯  
贈君一語君應笑  
競注江河本不流

辨才法師嘗以詩見寄繼聞示寂追次其韻

遙聞隻履去  
脩然詩翰纔收數月前  
江海盡頭人滅度  
亂山深處塔孤圓  
憶登夜閣天連鴈  
同看秋崖月破煙  
尚有衆生未成佛  
肯超欲界入諸禪

次韻公闢州宅月夜偶成二首

新秋過雨月如霜  
緩足蓬萊徹上方  
翠木玲瓏藏寶界  
白煙濃淡鎖華堂  
書名越艷誰興發  
角動單于自感傷  
山似臥龍天似水  
却疑身在海中央

繚繞千重雨後涼  
月含秋色上東方  
風催絡緯歸金井  
月轉檀欒蔭畫堂  
游目騁懷佳興發  
感時撫事壯心傷  
歸來枕簟清無夢  
臥看明星到未央

次韻公闢即席見寄

與君鄰並共烟霞乘興時時過我家更漏一新聞曉角  
門闌數級看秋花湖山對值全如買風月相期不用賒  
賴有醉毫吟更苦他年分作句圖誇

次韻公闢將受代書蓬萊閣

城連湖岸水為關旦暮漁樵自往還龜負寶林新佛地  
龍蟠使宅老仙山平生仕宦今何得終日登臨獨未閒  
歲滿徘徊難遽別就中瀟洒異人間

次韻公闢聞角有感

一聽胡笳動越吟聲潛地底氣逾深  
千宮月色單于曲  
萬里天光魏闕心  
秉燭何人猶把盞挑燈有女正穿針  
早寒時節黃昏後更逐西風應遠砧

寄公闕

憶昔都門手一携春禽初向苧蘿啼  
夢回金殿風光別  
吟到銀河月影低  
舞急錦腰迎十八酒醒玉盞照東西  
何時得遂扁舟去邂逅從君訪剡溪

呈公闕

東歸行路歎賢哉碧落新除寵上才  
白傅林塘隨畫去吳山花鳥入詩來  
唱酬自有微之在談笑應容逸少陪  
除此兩翁相見外不知三徑為誰開

奉和荅老

童子何知幸最深久班籍湜奉登臨  
挾經屢造芝蘭室揮麈常聆金玉音  
黃卷香焚春晚晚絳紗人散夜蕭森  
明朝只恐絲綸下回首青雲萬里心

秋興擬杜子美

紫領寬袍漉酒巾  
江頭蕭散作閒人  
悲風有意催林葉  
落日無情下水濱  
車馬憧憧諸道路  
市朝衮衮共埃塵  
覓錢稚子啼紅頰  
不信山翁篋笥貧

秋興擬杜牧之

鼓鼙夜戰北窓風  
霜葉鋪堦疊亂紅  
一段新愁驚枕上  
幾聲悲鴈落雲中  
眼前時節看馳馬  
日下生涯寄斷蓬  
弟妹別來勞夢寐  
杳無消息過江東

秋興擬白樂天



不因霜葉辭林去的當山翁未覺秋北里酒錢煩屢索  
南州詩債懶頻酬欲歌金縷羞紅粉擬插黃花避白頭  
底事登臨好時節等閒收拾許多愁

中秋口號

并引一云雲  
山閣白語

伏以四難并得既為樽俎之佳期五福具膺實號縉紳  
之盛事矧中秋之屆候宜公燕之交歡恭惟判府大資  
身遇聖神家傳將相時應半千之運論歸尺五之天姓  
名久在於金甌方面暫分於玉節浮堦飛閣引南國之

佳人豪竹哀絲奏西園之清夜

雲山簷楯接低空公宴初開氣鬱葱  
照海旌幡秋色裏  
激天鼓吹月明中香槽旋滴珠千顆  
歌扇驚圍玉一叢  
二十四橋人望處台星正在廣寒宮

致政通議口號

并引一作  
秋燕口號

竊以五福具膺實縉紳之盛事四難并得亦樽俎之佳  
期恭惟致政通議馬鶴英姿鼎槐華胄身見六朝之盛  
位登兩省之崇北陌東阡時命青牛之駕左圖右史日

從赤松之遊判府左丞神嶽殊鍾皇躔異稟方面雖分  
於玉節姓名已覆於金甌舉白飛觴極水陸四方之饌  
彈絲擊石盡賓主一時之歡

秋空畫隼照新晴符隱庵前小隊停玉笋金醪通繾綣  
鳳笙龍管入青冥靚粧醺酒花侵席寶獸呀香霧滿庭  
太史應占豫州分上台星近老人星

七言絕句

口號

美酒忘憂之物流光過隙之駒不稱人心十事常居八  
九得開口笑一月亦無二三莫思身外無窮且賭尊前  
見在功名富貴何異楚人之弓城郭人民問取遼東之  
鶴付與香鈿畫鼓盡歡美景良辰欲奏長謠聊陳短韻  
平原居士今無影鸚鵡空洲誰舉杯猶有漁陽搥撾鼓  
為君醉後作輕雷

早春

黃金軟軟滿垂楊尚有春寒到畫堂酒力漸消歌扇怯

入簾飛雪帶梅香

赴杭倅至汴上作

俯仰觚稜十載間  
扁舟江海得身閒  
平生孤負僧牀睡  
准擬如今處處還

無題

掃地燒香閉閣眠  
簾紋如水帳如煙  
客來夢覺知何處  
掛起西窓浪接天

蘇子瞻記江南所題詩本不全余嘗見之記其五

絕今以補子瞻之遺

紅窓小泣低聲怨永夕春風斗帳空中酒落花飛絮亂  
曉鶯啼破夢忽忽

晞草露如郎倖薄亂花飛似妾情多歸鴻見處彈珠淚  
語燕聞時斂翠蛾

琴絃斷續愁兼恨嶺水分流西復東深院小扉紅日落  
繡窓閒倚更誰同

參橫霽色天沉水鳥宿寒枝竹鎖煙衾惹舊香清夜半

淚凝殘燭畫堂前

寒信霜風柿葉黃  
冷燈殘月照空牀  
看君記憶傳文錦  
字字愁縈惹斷腸

金山晚眺

西津江口月初弦  
水氣昏昏上接天  
清渚白沙茫不辨  
只應燈火是漁船

病中

疎簾薄幔對青燈  
鸛鵒喧喧自轉更  
風雨渺漫人臥病

地爐湯鼎更悲鳴

聞鴈懷邵仲恭

楚澤吳天去未遲  
煩君且傍蒜山飛  
白袍居士如相問  
為說緇塵欲滿衣

冬蚊

蚤蠆蜂螫罪一倫  
未如蚊子重堪嗔  
萬枝黃落風如射  
猶自傳呼欲噬人

白馬寺晚泊



濛濛晚雨暗回塘  
遠樹依微不辨行  
人物漸稀疎磬斷  
綠蒲叢底宿鴛鴦

雪上感懷

七年三過白蘋洲  
長與諸豪載酒游  
舊事欲尋無處問  
雨荷風蓼不勝秋

和程給事贈虞道判六首

刀圭雲母具晨餐  
門對三層步斗壇  
夜考鶴經分七九  
曉占歲氣辨齡丹

火棗交梨近可食不須地肺及天壇龜藏坎海毛皆綠  
鳳宿離宮色自丹

紫府沉沉掩夜關竹陰清掃月中壇歲星偷得桃枝碧  
董奉栽成杏子丹

囊中玉色已經飡醉拂絲桐坐杏壇應笑倦游塵滓客  
鬢毛蕭瑟事鉛丹

漢武遊心縹緲間文成五利盡登壇何如曲屈韓夫子  
不羨神君白玉丹

使君本住道家山時訪玄都太古壇陰惠已能追許令  
治功不獨過韋丹

處州閒題

清酒一杯甜似蜜美人雙鬢黑如鴉莫誇春色欺秋色  
未信桃花勝菊花

春詞絕句五首

蒲萄裯暖蕙薰微紅日窺軒睡覺時人倦披衣雙燕出  
青絲高冑木蘭枝

弱雲亭午弄春嬌  
高柳無風妥翠條  
懶讀夜書搔短髮  
隔垣時聽賣餠簫

都城春富百花披  
長憶人歸駐馬時  
淺色御黃應好在  
為誰還發去年枝

風驅白雨洗園林  
蔽地飛花一寸深  
狂紫浪紅俱已矣  
老春雖在亦何心

顛毛漸脫風情少  
匣劍空存俠氣銷  
人遠地偏無酒肉  
春深花鳥謾相撩

秋詞二首

雲惹低空不更飛  
斑斑紅葉欲辭枝  
秋光未老仍微暖  
恰似梅花結子時

無數青莎繞玉階  
夕陽紅淺過墻來  
西風莫道無情思  
未放芙蓉取次開

齊逸亭

酸發郎君更不歸  
故亭蕭瑟異當時  
玉笙金管渾如夢  
只有梅花三四枝

春日

殘臘渺茫雲外日  
新春彷彿夢中來  
雪霜便覺都無力  
只見桃花次第開

雪中寄丹元子

陰風一夜攪青冥  
風定紛紛雪片零  
想見玉清真境上  
白虛光裏誦黃庭

宿乾明方丈

漫天白雪無端現  
佛室夜艾烏更啼  
相逢解頤足自慰

勿語俗子念心攜

新開湖送孫誠之有龍見於東北因成絕句

狂客走影暗悠悠  
菡萏吹風五月秋  
黃綬不為無氣槩  
蒼龍隨尾送行舟

呈李公擇

青箋擘處銀鈎斷  
紅袂分時玉筯懸  
雲脚漸收風色緊  
半規斜日射歸船

落日馬上

日落荒阡白霧深  
紫騮嘶顧出疎林  
回頭已失來時路  
杳杳金盤墮翠岑

次韻參寥三首

武陵漁子入花源  
但見秦人不得仙  
會有黃鸝鳴翠柳  
何妨白眼望青天

長安仕路與雲齊  
僦僕羸驂不可躋  
但得玄暉曾折簡  
何須平子更安題

旦折花枝醉復醒  
人間時節易崢嶸  
屠龍肯自羞無用



畫虎從人笑不成

和書天慶觀賀祕監堂三首

老仙舊地枕東城古木參天警晝聲我亦願為方外友  
風流何必並時生

使君平昔慕高情一到祠堂意一新戶外黃冠應指點  
公應便是謫仙人

衣屨蕭條氣久清豪家門館未嘗行朱甍碧瓦何從得  
疑有陰兵夜助成

和書觀妙庵

龍瑞宮中種玉人  
誅茅結室傍秋雲  
自言洞裏山川別  
此處十分未一分

早春題僧舍

東園紫梅初破蕾  
北澗綠水方通流  
歸去一春花月夢  
定應常在此中遊

盆池釣翁

誰刻仙材作釣翁  
尺池終日釣微風  
令人却憶鴟夷子

散髮五湖狂醉中

賞酴醾有感

春來百物不入眼  
唯見此花堪斷腸  
借問斷腸緣底事  
羅衣曾似此花香

淮海後集卷四

欽定四庫全書薈要卷一萬五千二百六十三

集部

淮海後集卷五

宋 秦觀 撰

表啓

代蘄州守謝上表

愚罪著明當以萬死聖恩寬大尚假一麾顧惟昧冒之  
深第積戰兢之至伏念臣不學無術寡偶少徒荷先帝  
之誤知繇常員而擢用始欲悉力而舉職莫知長慮以

佐時自取悔尤至煩揮黜責其妄作便可屏之遠方憫  
其知非猶當投於散地敢圖生死而肉骨尚容宣化以  
承流況臣粵自去冬嘗陳愚懇願歸使節求綰郡章雖  
此左遷正符宿願恩既深而逾望感亦極而難言此蓋  
伏遇皇帝陛下大德海涵至仁天覆謂災青之可赦以  
過失為當憐寬其未棄之誅開以自新之路辨之不早  
嗟已迫於桑榆來者可追幸未填於溝壑誓捐軀命上  
報恩私

代程給事乞祝聖表

本州管內舊有應天寺者創於宋元徽中其地據寶林  
山巔南直秦望北負臥龍巖山挾其左鑑水趨其前圍  
視井邑如閱圖畫越之形勝十得六七比於熙寧十年  
八月遇火金石土木之觀一夕殆盡樓觀宮室化為丘  
墟父老過之徜徉悼歎若失所依憑者因相率詣州自  
陳願以私錢修復故寺本州尋具其事上聞仍乞易為  
十方蒙朝廷報可賜號寶林禪院於是郡之衣冠縑素

無不悅豫鼓舞以謀報上因大出力財爭先請奮浮圖  
棟宇次第告成曾未踰年已復舊觀蓋所據之地勝故  
興也易所遭之時盛故成也速不然何以至是哉謹按  
寶林禪院其地本名龜山前世文士見於篇章上有鰻  
井歲旱禱雨輒應臣等竊以為龜神物也有先事之智  
而壽踰千歲鰻龍類也有施澤之仁而功被萬物位正  
南方與時相見勢出人境足以有臨稽之於名效之於  
物參之於方位考之於形勢而酌之於民情理從事順



實宜永為頌祝陛下聖壽之地臣等自今後每遇同天  
節只於本院啟建道場及禱祠雨澤吉祥齋供其餘官  
中道場並不令於本院啟建夫下達士民之願上報君  
父之恩臣子之職也臣等荷國厚恩無以答生成之萬  
一庶幾因緣塔廟少伸犬馬之誠仰瞻闕庭不勝大願  
伏望聖慈特賜俞允

坤成節功德文疏

寶歷開祥爰屬補天之運金行御氣適當夢帝之期躬

詣精廬妙修勝會致上方香積之飯閱西土貝多之文  
庶憑調御之緣少効華封之祝太皇太后伏願睿圖鞏  
固宸筭增隆日月無私永照臨於下土風雲不間長感  
會於中天

代答范相公啓

堯夫

器兼文武道備天人始列周行綽有棟梁之器及參大  
政鬱為社稷之臣果振家聲遂當國相昔韋平嗣興於  
西漢袁楊繼起於東京張公錫延賞之名陸氏取象先

之意雖云華族未必熙朝然猶前史以為美談當世謂之榮事固未有百年遇太平之運四世膺爰立之求以今言之一何盛也某夙登門叨嘗頌威容念班謁以無由第承風而竊忭

賀孫中丞啓

光奉明恩進陞中憲伏惟慶慰恭惟中丞侍郎受天間氣為世真儒力足以扶顛持危器足以致遠任重巍然如衣服之有冠冕卓爾若鳥魚之有鳳鯢三朝充諫諍

之官奮身不顧七郡任蕃宣之寄為民所思動靜不失  
其時遜逆必求諸道比支物望簡在上心粵自貳卿遂  
登執法嚴霜被野既知松柏之後凋猛虎歸山將見藜  
藿之不採某叨持符節久遠門闌

云云

賀吏部傅侍郎啓

光膺帝命進貳天官

云云

某官道術淵微器猷宏博更

險夷而不測其操踐中外而不易其心漢節初歸常折  
董宏之妄楚郊臥治尤推汲黯之忠方傳報政之成以

聽除書之下亟辭右輔復踐中臺邦人遮轍以願留朝  
士舉酒而相賀吏曹三綜既知冰鑑之無私王體一謀  
當見鈞衡之益重某屬驅軺傳阻造門闌

代何提舉賀范樞密啓

光膺睿命進貳中樞碩輔登崇溥天均慶竊以天運無  
積蓋由八柱之仰成歲功不虧亦自四時而分治矧媯  
皇補天之際當商老和羹之初儻非心德之素同難冀  
事功之必立伏惟某官器兼文武學備天人雖小善而

必為臨大節而不奪入參臺省佇聞折檻之風外總戎  
機寢罷爭桑之釁負謗傷而精神益勵處閒散而聞望  
愈隆逮神聖之纂臨屬風雲之感會念昔仁祖虛懷於  
慶歷之間惟時先公奏對於天章之下謂道可行於反  
掌而世亦至於容刀盛世難逢事空傳於故老嗣賢復  
出天實慰於斯民既被召以旋歸遂干霄而直上千尋  
廣廈欣然慰多士之心萬里長城足以制四夷之命某  
夙登門仞久曠書牋方從沙汰之餘未卜棲翔之所側

聞進拜倍切驩愉巖石雖瞻尚鬱縉紳之論袞衣遂有  
方疇區夏之情

賀門下呂僕射啓

微仲

伏審光奉明恩進陞左輔伏惟慶慰恭以某官當世大  
儒斯民先覺毀譽莫為之損益窮通靡得而變渝北平  
如高山深林人何可測巨源若渾金璞玉器孰能名卓  
乎在縉紳之中屹然有公輔之望果踐西臺之峻遂躋  
端揆之崇邸音喧騰士類交慶納忠有素詎須德裕之

六歲應變無方不止姚崇之十事

謝潁州呂吏部啓

叨奉宸恩謬當藩郡境預四鄰之末潤霑九里之餘憑  
几占書未進河南之牘朶雲號體俄蒙郇國之函仰荷  
謙冲退增悚愧恭以某官器周事變學造淵微出四世  
五公之門遇千載一時之運文辭則操觚立就政事則  
投刃皆虛荀氏八龍盡繼高陽之美河東三鳳尤推鸞  
鷟之奇會公旦之相周俾伯禽而侯魯布宣詔令已成



師帥之功近省君親行陟股肱之任某承風茲久覲德  
未遑企頌之懷敷宣罔既

答丁彥良書

某啓辱書及詩備悉雅旨且承邇來為况甚休以感以  
慰竊味詩之大意率多辛酸耿愴之旨君生長素富貴  
而喜作寒士語何耶因知詩非能窮人詩窮然後工得  
非政欲以此合古人語乎兼審薄挂吏議小累不足以  
玷遠猷毋甚怏怏也知罷官里閭慕義嗜學是所以增

其志尚爾白玉微瑕千丈松礫石不害他日為大器跖  
弛之士自有御之者幸順時自愛區區不宣某再拜

與許州范相公

某再拜安撫相公閣下某淮海一介之士行能無取比  
因緣科第獲列仕版又屬朝廷復置賢科而一二邇臣  
猥以充賦名實乖戾果致多言相公當國憐其孤單不  
卽聞罷使得自便引疾而歸僥倖深矣比遇相公均逸  
藩輔而某承乏之地實在節制之下疵賤無介紹不敢

以書自通眷眷私懷何以云喻豈圖相公過有採聽首  
賜論薦使備著述之科檄書至發函伏讀且喜且懼盖  
相公於某昔既有保全之賜今又有論薦之恩顧惟狂  
愚何以辱此屬拘官守不獲進謝門闌又不敢具啓事  
以叙悃愫區區俗禮非國士所以報知己者也惟相公  
裁察

祭監稅主簿文

維年月日致祭於歿故監稅主簿之靈嗚呼賢才懿德

宜顯周行以君德厚宜享壽康仕既未達人其云亡顧  
天理之莫究茲寮友之永傷嗚呼西風蕭颯長夜淒涼  
靈車戒道丹旌飛揚有殽在俎有酒盈觴臨岐伸奠歸  
安故鄉尚饗

淮海後集卷五

欽定四庫全書薈要卷一萬五千二百六十四

集部

淮海後集卷六

宋 秦觀 撰

傳 并雜文

清和先生傳

清和先生姓甘名液字子美其先本出於后稷氏有粒食之功其後播棄或居於野遂為田氏田為大族布於天下至夏末世衰有神農之後利其資率其徒往倖於

田而歸其倔彊不降者與彊而不釋甲者皆為城旦春  
賴公孫杵臼審其輕重不盡碎其族徙之陳倉與麥氏  
谷氏鄰居其輕者猶為白粲與鬼薪杵已而逃乎河內  
又移於曲沃曲沃之民悉化焉曲沃之地近於甘古甘  
公之邑也故先生之生以甘為氏始居於曹受封於鄭  
及長器度汪汪澄之不清撓之不濁有醞藉涵泳經籍  
百家諸子之言無不濫觴孟子稱伯夷清下惠和先生  
自謂不夷不惠居二者之間而兼有其德因自號曰清

和先生云士大夫喜與之游詩歌曲引徃徃稱道之至於牛童馬卒閭巷倡優之口莫不羨之以是名漸徹於天子一召見與語竟日上熟味其旨愛其淳正可以鎮澆薄之徒不覺膝之前席自是屢見於上雖郊廟祠祀之禮先生無不預其選素與金城賈氏及王庖子善上皆禮之每召見先生有司不請而以二子俱見上不以為疑或為之作樂盛饌以待之歡甚至於頭沒杯案先生既見寵遇子孫支庶出為郡國二千石徃徃皆是至

於十室之邑百人之聚先生之族無不在焉昔最著聞者中山宜城湓浦皆良子弟也然皆好賓客所居冠蓋駢集賓客號呶出入無節交易之人所在委積由是上疑其濁小人或乘間以賄入欲以逢上意而取寵一日上問先生曰君門如市何也先生曰臣門如市臣心如水上曰清和先生今乃信其清和矣益厚遇之由是士大夫愈從先生游鄉黨賓友之會咸曰無甘公而不樂既至則一坐盡傾莫不注挹然先生遇事多不自持以



待人斟酌而後行嘗自稱沽之哉沽之哉我待賈者也  
人或召之不問貴賤至於斗筲之量挈瓶之智或虛已  
來者從之如流布衣寒士一與之遇如挾纊惟不喜釋  
氏而僧之徒好先生者亦竊與先生游焉至於學道隱  
居之士多喜見先生以自晦然先生愛移人性情激發  
其膽氣解釋其憂憤可謂能令公喜能令公怒者邪王  
公卿士如灌夫季布李景儉桓彬之徒坐與先生為黨  
而被罪者不可勝數其相歡而奉先生者或至於破家

敗產而不悔以是禮法之士疾之如讐如丞相朱子元  
執金吾劉文叔郭解長孫登皆不悅未嘗與先生語時  
又以其士行或久多中道而變不承於初咸毀之曰甘  
氏孽子始以詐得終當以詐敗矣久之或有言先生性  
不自持無大臣輔政之體置之左右未嘗有沃心之益  
或虞以虛閒廢事上由此亦漸疎之會徐邈稱先生為  
聖人上惡其朋比大怒遂命有司以光祿大夫秩就封  
宗廟祭祀未嘗見遂終於鄭仕於郡國者皆不奪其官

初先生既失寵其交游往往謝絕甚者至於毀棄素行以賣直自售惟吏部尚書畢卓北海相孔融彭城劉伯倫篤好如舊融嘗上書辨先生之無罪上益怒融由此亦得罪而倫又為之頌與當世為有故不著今掇其行事大要者著於篇

太史公曰先生之名見於詩書者多矣而未有至公之論也譽之者美逾其實毀之者惡溢其真若先生激發壯氣解釋憂憤使布衣寒士樂而忘其窮不亦薰然慈

仁君子之政歟至久而多變此亦中賢之疵也孔子稱  
有始有卒者其惟聖人乎先生何誅焉予嘗過中山慨  
然想先生之風聲恨不及見也乃為之傳以記

法雲寺長老然香會疏文

竊以香者妙通法性冥動聞機大則香積如來令天人  
而入戒律次則香嚴童子得羅漢而證圓通覺至性之  
清嚴破塵穢之濁穢肆求善友同結勝緣漸沉水之密  
圓斥棗膏之昏鈍規模既遠誓願尤長若秣若圓得無

礙法非煙非火轉不退輪偶就印以成文常于空而作  
盖無前後來去之際有解脫知見之因曄乎若光明之  
雲佳哉如鬱葱之氣反聞聞性八百之功德以成自覺  
覺他億萬之河沙斯遍

越州請立程給事祠堂狀

浙水之東七州獨越為都會凡七州之軍事督焉其地  
西帶江北被海多雄山傑澤有桑麻魚稻藤薺竹箭之  
饒土沃而流水清而不迫非舟車足力所會故其民喜

耕耨勤織維尊本而薄末狡獪詆欺之弊視他州為少  
然以險阻之故豪強惡少跌宕不逞之民一失其業則  
徃徃什聚伍行剽攘攻劫於江海之上不時去之則蔓  
延而成大盜矣為太守者審知風俗之厚刑政並修則  
一方可以指麾而治不然雖億力勞心猶無益也熙寧  
十年詔以給事中集賢殿修撰廣平程公知軍州事公  
素以治行稱天下越人無不踴躍竦企願見公之所為  
及至政尚簡肅不為苟且苛細之事事至而後必行亦

無所假借發隱擿伏敏捷如神每得所謂豪強惡少跌宕不逞之民草斬而獸逐之至斷絕乃已於是距吳際閩楚千里肅然盜賊不敢發川行途止如即其家獄訟衰息風雨時至仍歲大穰乃禮賢俊仁老孤簡練士卒繕修宮寺至於郵亭刻漏為之一新頽廢偃僵斬然俱起然後知公之才所遇縱橫無窮其所厭伏東西逆銷變故於未形者多矣非特越人受其賜也使行且大用於朝推其道於天下則其所就者又可量耶先是太子

少保南陽趙公有惠政於越既去而公承其後故議者謂近世越州之政未有如二公者南陽公嘗命畫史圖太子少師天水趙公并公與已游從之像號三老圖而越之好事者遂作三老堂以寘之元豐二年公還朝郡之衣冠縉黃耆艾之士若干人乞留於部使者三為之上不報因相與泣曰公去矣其像雖存於三老堂然吾人之心未厭也聞公嘗帥洪福廣三郡三郡皆有生祠豈越獨無有今寶林院者公之所興建也若即其地為



堂立公之像如三郡故事以慰吾人之思不亦可乎衆  
曰然於是又以狀白使者請立公之祠堂焉是時某適  
自淮南來省親將還越人謂某曰吾州更饑歉札瘡之  
後程公實撫養而教誨之去年冬福州太守司諫孫公  
嘗道於此具見其事今祠堂成有日矣謀為記宜莫如  
孫公者聞子與孫公鄉里且門人也盍撫厥實以為我  
請乎某既歎程公之政有以媚於民又嘉越人能大其  
施而推報之也乃為論次其事并州之風俗具而載之

以備孫公之采擇焉

精騎集序

予少時讀書一見輒能誦暗疏之亦不甚失然負此自  
放喜從滑稽飲酒者游旬朔之間把卷無幾日故雖有  
彊記之力而常廢於不勤比數年來頗發憤自懲艾悔  
前所為而聰明衰耗殆不如曩時十一二每閱一事必  
尋繹數終然掩卷茫然輒復不省故雖有勤苦之勞而  
常廢於善忘嗟夫敗吾業者常此二物也比讀齊史見

孫搴答邢詞云我精騎三千足敵君羸卒數萬心善其  
說因取經傳子史事之可為文用者得若干條勒為若  
干卷題曰精騎集云噫少而不勤無如之何矣長而善  
忘庶幾以此補之

故龍圖閣直學士中大夫知成都軍府事管内勸  
農使充成都府利州路兵馬鈐轄上護軍隴西郡  
開國侯食邑一千一百戶食實封三百戶賜紫金  
魚袋李公行狀 曾祖諱宗誼故不仕 祖諱知

至故不仕 父諱東故任江寧府溧水縣尉累贈  
特進

南康軍建昌縣李常字公擇年六十四李氏宗出唐宗  
室郇公諱遠祖濤五代時號稱名臣仕皇朝為兵部尚  
書封莒國公莒公少時仕於湖南氏有一子留江南公  
其裔孫也故今為南康建昌人公少警悟好學彊記為  
文章捷敏初若不經意而比成粲然屬寓深遠皇祐中  
登進士甲科授防禦推官權江州軍事判官丁昌源郡

太夫人憂解官又丁光祿公憂服闋權宣州觀察推官  
監漣水車轉般倉故大理寺丞知洪州奉新縣未行用  
韓公獻肅薦為三司檢法官神宗即位詔大臣舉館職  
曾宣公以公應詔召試學士院除祕閣校理編校史館  
書籍兼太常博士兼史館檢討置三司條例司檢詳官  
看詳中書條例權判尚書考功改右正言同管勾國子  
監公事是時王荊公輔政始作新法諫官御史論不合  
者輒斥去公上疏力詆其非以為始建三司條例司雖

致天下之議而善士猶或與之至於均輸之論興青苗之法立公然取息傳會經旨以為無嫌則天下固已大駭而善士亦不復與矣時荆公之子雱與溫陵呂惠卿皆與聞國論凡朝廷之事三人者參然後得行公言陛下與大臣議某事安石不可則移而不行安石造膝議某事安石承認詔頒焉呂惠卿獻疑則反之詔用某人安石惠卿之所可雱不說則又罷之孔子曰祿去公室政在大夫陪臣執國命今皆不似之耶而其論青苗尤為

激切至十餘上不已於是落職通判滑州歲餘復職知  
鄂州徙知湖州遷尚書祠部員外郎賜五品服徙知齊  
州齊故多盜公至痛懲艾之論報無虛日盜猶不止他  
日得黥盜察其可用刺為兵使直事鈴下間問以盜發  
輒得而不哀止之故曰此繇富家為之囊使盜自相推  
為甲乙官吏巡捕及門擒一人以首則免矣公曰吾得  
之矣乃令得藏盜之家皆發屋破柱盜賊遂清始公在  
武昌吳興政尚寬簡日與賓客縱酒笑詠吏民安樂之

郡以大治於是世知公之才所值無不可也屬河決灌  
山東諸郡公捍禦有術部使者以聞降詔書獎諭從淮  
南西路提點刑獄遷尚書度支員外郎坐厚善直史館  
蘇公軾得其詩文不以告罰金寄祿格行換朝散郎遷  
朝請郎試太常少卿公去國十五年至是還朝士大夫  
喜見於色以謂正人復用也以職事對稱旨面賜三品  
服未幾試禮部侍郎文昌府成車駕臨幸恩遷朝奉大  
幸恩遷朝散大夫上即位覃恩遷朝請大夫試吏部侍



郎遷朝議大夫俄試戶部尚書詔百官轉對公以七事  
應詔一曰崇廉耻二曰存貢舉三曰別守宰四曰去賊  
貪五曰慎疑獄六曰擇師儒七曰修役法皆當時急務  
而其言役法尤合公論又取差免二法折衷為書上之  
以為法無新陳便民者良法也論無彼已可久者確論  
也又曰貧富俱出貲則貧者之所難堪使富者出貲貧  
者出力庶乎其可也大畧如此遷中大夫除御史中丞  
兼侍讀加龍圖閣直學士初元豐河決小吳神宗以河

勢方趨西北難以力回詔勿復塞須其自定增立隄防而或者以謂非悠遠之策請開澶淵游河分殺水勢又欲自蘇村口截為隄導還故處詔遣公視之還奏非便又遣吏部侍郎范公百禄給事中趙公君錫覆視奏與公合而或者猶執前議銳於興役故朝廷疑之至是公申論其弊章六七上而其役竟罷公又請分詩賦經義兩科以盡取士之法別自致因人為兩塗以究省官之術其忠言讜論蓋不可以一二舉至於因時乘間導迎

和氣者多密以啓聞故莫得而知也俄守兵部尚書固  
辭不受懇求外補章屢上遂出知鄧州數月徙成都府  
行及陝府閬鄉縣暴卒於傳舍實元祐五年二月二日  
也累勲至上護軍隴西郡侯公風度凝遠與人有恩意  
而遇事彊毅不為苟合初善主荆公荆公當國冀其為  
助而詆之乃力於他人荆公嘗遣雋喻意曰所爭者國  
事少存朋友之義公曰大義滅親况朋友乎自守益確  
士論以此歸之少時讀書於廬山五老峯下白石菴之

僧舍後身雖出仕宦而書藏於山中如故每得異書輒益之至九千餘卷山中之人號李氏山房仲兄布蚤卒事其嫂張敬甚撫其子秉彝如已子自奉清約所俸入多少以賙親族捐館之日無羸貲朝廷聞之常賙外特賜五十萬有文集若干卷藏於家初娶狄氏襄陽遵度主簿之女蚤卒贈某縣君遵度亦俊傑士寶元慶厯間以文章顯名再娶魏氏光祿卿琰之女亦蚤卒贈遂寧縣君又娶遂寧之娣封安康郡君子男四人長曰攄揚

州江都縣尉蚤卒次日邇承奉郎次日逡承務郎次日  
迢承務郎女三人長適郢州長壽縣主簿孫端次適郊  
祀齋郎丘揖次適進士黃叔敖諸孤自閬鄉扶柩南歸  
而公之伯兄時為江南西路轉運使遂以其年十月丙  
午葬公於南康軍建昌縣千秋之原前期諸孤請狀公  
之行治而公之美實多難以具著著其出處始終之大  
者以告諸史氏謹狀

雜說

唐杜淦江夏人也自罷漢陰令居泗水上烈日笠首親督耕夫一年而食足二年而衣食兩餘三年而屋室完新六畜肥繁器用皆備自墾荒起家十五年為富家翁不假一人之力一毫之助彼嘗謂人曰夫忍耻入仕不困妻子衣食者幾希彼忍耻我勞力皆衣食耳顧我何如由功名之士觀之則誠為拘繫跼促人也若夫恬於進取安分潔已者蓋有取焉爾

通事說

文以說理為上序事為次古人皆備而有之後世知說理者或失於畧事而善序事者或失於悖理皆過也盖能說理者始可以通經善序事者始可以修史

蠶書

予閒居婦善蠶從婦論蠶作蠶書

考之禹貢揚梁幽雍不貢繭物充筐織文徐筐玄織縞荆筐玄纁璣組豫筐纖纈青筐縻絲皆繭物也而桑土既蠶獨言於充然則九州蠶事究為最乎予游濟河之

間見蠶者豫事時作一婦不蠶比屋詈之故知究人可為蠶師今予所書有與吳中蠶家不同者皆得究人也

種變

臘之日聚蠶種沃以牛溲浴於川毋傷其藉廼縣之始審臥之五日色青六日白七日蠶已蠶尚臥而不傷

時食

蠶生明日桑或柘葉風戾以食之寸二十分晝夜五食九日不食一日一夜謂之初眠又七日再眠如初既食



葉寸十分晝夜六食又七日三眠如再又七日若五日  
不食二日謂之大眠食半葉晝夜八食又三日健食乃  
食全葉晝夜十食不三日遂繭凡眠已初食布葉勿擲  
擲則蠶驚母食二葉

### 制居

種變方盡及乎將繭乃方四丈織萑葦範以蒼筤竹長  
七尺廣五尺以為筐建四木宮梁之以為槌縣筐中間  
九寸凡槌十縣以居食蠶時分其居糞其葉餘以時去

之萑葉為籬勿密屈藁之長二尺者自後茨之為簇以居繭蠶凡繭七日而採之居蠶欲溫居繭欲涼故以萑鋪繭寒之以風以緩蛾變

化治

常令煮繭之鼎湯如蟹眼必以筯其緒附於先引謂之餵頭毋過三系則系麤不及則脆其審舉之凡系自鼎道錢眼升於鑠星星應車動以過添梯乃至於車

錢眼

為版長過鼎面廣三寸厚九黍中其厚挿大錢一出其  
端橫之鼎耳後鎮以石緒總錢眼而上之謂之錢眼

鎖星

為三蘆管管長四寸樞以圓木建兩竹夾鼎耳縛樞於  
竹中管之轉以車下直錢眼謂之鎖星

添梯

車之左端置環繩其前尺有五寸當車牀左足之上建  
柄長寸有半匝柄為鼓鼓生其寅以受環繩繩應車運

如環無端鼓因以旋鼓上為魚魚半出鼓其出之中建柄半寸上承添梯添梯者二尺五寸片竹也其上揉竹為鈎以防系竅左端以應柄對鼓為耳方其穿以閑添梯故車運以牽環繩繩簇鼓鼓以舞魚魚振添梯故系不過偏

車

制車如轆轤必活其兩輻以利脫系

禱神

卧種之日升香以禱天馬先蠶也割鷄設醴以禱婦人  
寓氏公主蓋蠶神也母治堰母誅草母沃灰母室入外  
人四者神實惡之

### 戎治

唐史載于闐初無桑巧鄰國不肯出其王即求置婚許  
之將迎乃告曰國無帛可持蠶自為衣女聞置蠶帽絮  
中關守不敢驗自是始有蠶女刻石約無殺蠶蛾飛盡  
乃得治繭言蠶為衣則治繭可為絲矣世傳繭之未蛾

而竅者不可為絲頃見鄰家誤以竅繭雜全繭治之皆成絲焉疑蛾蛻之繭也欲以為絲而其中空不復可治嗚呼世有知于闡治絲法者肯以教人則貸蠶之死可勝計哉予作蠶書哀蠶有功而不免故錄唐史所載以俟博物者

書丁彥良明堂議後

祀國事之大者歷世洪儒碩生議論考訂往往自相違戾丁俠以世家子早假蔭以官少年彊學援質有根柢

訶詆前載惜乎未能以此獻諸朝得付有司禮官博士  
相與校正以備一代闕文君不能姑愛惜遵養以待云

錄龍井辯才事

熙寧九年秀州嘉興縣令陶彖有子得疾甚異形色語  
笑非復平人令患之乃大出錢財聘謁巫祝厭勝百方  
終莫能治是歲辯才法師元淨適以事至秀法師高僧  
也隱於錢塘之天竺山傳天台教學者數百人又持善  
呪水疾病者飲其所呪水輒愈吳人尊事之今素聞其

名即馳詣師具狀告曰兒始得疾時見一女子自外來  
相調笑久之俱去稍行至水濱遺詩曰生為木卯人死  
作幽獨鬼泉門長夜開衾幃待君至自是屢來且有言  
曰仲冬之月二七之間月盈之夕車馬來迎今去妖期  
逼矣未知所處願賜哀憐師乃許諾因杖策從至其家  
除地為壇設觀音像於中央取楊枝露水灑而咒之三  
遶壇而去是夜兒寢安然不復如他時矣明日復來結  
跏趺坐引兒問曰汝居何地而來至此答曰會稽之東



卞山之陽是吾之宅古木蒼蒼師又問汝姓誰氏答曰  
吳王山上無人處幾度臨風學舞腰師曰汝柳姓乎乃  
蹶然而笑師良久呵曰汝無始已來迷已逐物為物所  
轉溺於淫邪流浪千劫不自解脫入魔趣中橫生災害  
延及無辜汝今當知魔即非魔魔即法界我今為汝宣  
說首楞嚴秘密神咒汝當諦聽痛自悔恨訟既往過愆  
返本來清淨覺性於是號泣不復有云是夜謂兒曰辯  
才之功汝父之虔無以加焉吾將去矣後二日復來曰

金  
卷六  
久與子遊情不能遽捨願一舉觴為別因相對引滿既  
罷作詩一章曰仲冬二七是良時江下無緣與子期今  
日臨岐一盃酒共君千里遠相離遂去不復見予聞其  
事久矣元豐二年見辯才於龍井山問之信然

書王氏齋壁

皇祐元年余先大父赴官南康道出九江余實生焉滿  
歲受代猶寓止僧舍未幾代者卒叔瞻之先君來領其  
職事通家相好也至和元年叔瞻始生於南康後予迎


老母來為汝南學官也而叔瞻亦奉太夫人閒居於郡之西郭時余之先大父母先人皆捐館而叔瞻之先君亦沒於瀘州皇祐逮今四十一年中間豐庠得喪死生休戚不可悉記獨兩家之孤各奉其母相遭於此甚可悲也

題彭景山傳神

內殿崇班致仕彭崇仁字景山胷中有韜畧吏事精密所至士大夫翕然稱之年四十不幸喪明家居無餘而

目不可治如老驥伏櫪心未嘗不在千里聞北風則耳聳然自道觀之物無幸不幸以得喪觀之豈異世有所負耶然人之有德慧術智者常存乎疾疾惟深也能披剝萬象而見已安知景山不得之沉冥中耶

淮海後集卷六



總校官庶吉士臣張能照

校對官編修臣朱攸

謄錄舉人臣勵世馨